

# Reelecziun onuraira

Tavau: Elecziuns da vischnanca

DA GION NUTEGN STGIER / ANR

■ **Las votantas ed ils votants da Tavau han confermà Tarzisius Caviezel sco landamma. Fatg ha il liberal 2314 vuschs. Da nov al cussegl pitschen appartegna Valérie Favre Accola. Ils ulteriurs trais candidats per quel greium èn vegnids confermads.** Elecziuns communalas er a Tavau ier dumengia. Sa mess a disposiziun per in ulteriur bienni da quatter onns è *Tarzisius Caviezel*, il president da vischnanca. Tar ina maioritad absoluta da 1285 vuschs ha l'actual landamma retschet 2314 vuschs e quai tar ina participaziun da 43%. Sia reelecziun è segir onuraira e tuttina fa surstar che 343 persunas han mess in cedel vid en l'urna.

## Tschintg candidats per quatter posts

Gì dad eleger ha il suveran da Tavau er ils commembers per il cussegl pitschen. Candidà per in ulteriur bienni avevan *Walser Stefan* da la ps e *Herbert Mani* da la pbd sco er *Simi Valär* da la pld. Tuts trais èn vegnids confermads e quai cun las suandantas vuschs tar ina maioritad absoluta da 1099 vuschs ed ina participaziun da 48%: *Stefan Walser*, 1847 vuschs, *Herbert Mani*, 1832 vuschs e *Simi Valär* cun 1802 vuschs. Da nov en il cussegl



**Tarzisius Caviezel resta landamma da Tavau.**

FOTO G. N. STGIER

pitschen è vegnida elegida *Valérie Favre Accola* da la pps e quai cun 1556 vuschs. Cuntanschì avunda vuschs cun 1436 vuschs, dentant sco da memia, ha er *Walter von Ballmoos* dals verdliberals.

## La pld sco victura

Per il cussegl grond da vischnanca cun 17 posts han candidà 21 umens e dunnas. La victura da quellas elecziuns è la pld cun guadagnar gist quatter posts. Da nov èn vegnids elegids per la pld *Jürg Zürcher*, *Peter Bättschi*, *Marc Gianola* ed *Alexandra Bossi*.

Sco nov commember dal cussegl grond da vischnanca èn vegnids elegids *Conrad Stiffler*, pps e *Roland Augstburger*, ps. Confermads en lur uffizis èn vegnids *Cyrrill Ackermann*, *Kevin Dieth* e *Hans Bernhard* da la pps. *Iris Hoffmann-Stiffler* da la pld e *Jacobina Knölle* da la pcd èn er vegnidas confermadas en lur mandat. Quai vala er per *Peter Däscher* da la pbd e *Christian Thomann* da la pev. Reelegids èn er vegnids *Vladimir Pilman* e *Hanspeter Ambühl* da la pld, *Christian Stricker* dals verd-liberals e *Philipp Wilhelm* da la ps.